

XXVI CATA DOS VIÑOS DE GALICIA – 2014

Organizada pola Consellería do Medio Rural e do Mar, coa colaboración dos Consellos Reguladores das Denominacións de Orixe Ribeiro, Valdeorras, Rías Baixas, Monterrei e Ribeira Sacra, terá lugar a XXVI Cata dos Viños de Galicia 2014, que consistirá nunha fase inicial de precata ou cata de selección e unha cata final.

BASES DA CATA

1. Nesta cata poderán participar os viños elaborados polas adegas inscritas nos rexistros de cada unha das denominacións de orixe existentes na Comunidade Autónoma de Galicia, así como os viños elaborados polas adegas produtoras de viños con indicación xeográfica protexida (“Viños da Terra”) da Comunidade Autónoma de Galicia, con produción controlada na campaña 2013. Estas indicacións xeográficas protexidas son: Val do Miño-Ourense, Betanzos e Barbanza e Iria.

2. As adegas que desexen participar cos seus viños nesta cata deberán enviar no prazo de **sete días** desde o día seguinte ao da publicación do anuncio da convocatoria deste concurso no Diario Oficial de Galicia, o correspondente boletín de inscrición debidamente cuberto, aos consellos reguladores nos que estean inscritos. Para o caso dos Viños da Terra enviaranse á Subdirección Xeral de Industrias e Calidade Agroalimentaria da Secretaría Xeral do Medio Rural e Montes, sita na avenida do Camiño Francés, 10, en Santiago de Compostela.

No caso das DDOO cada consello regulador certificará que as adegas que se inscriban para participar neste concurso, cumpren os requisitos e condicións establecidas nestas bases, con anterioridade ao inicio da recollida das mostras e para os viños con Indicación Xeográfica Protexida a mencionada certificación corresponderalle ao Instituto Galego de Calidade Alimentaria (INGACAL).

3. Todos os viños que se presenten á cata terán que ser da colleita do ano 2013, agás os que nalgunha das fases de elaboración estivesen en contacto con madeira que poderán ser do ano 2012.

As marcas presentadas por cada adega non poderán ser máis de dous viños brancos e dous viños tintos. Non obstante, para os grupos “Viños de Colleiteiro e de pequenas adegas” e “Viños da Terra” as marcas presentadas por cada adega non poderán ser máis de un viño branco e un viño tinto.

Todas as mostras que se presenten a concurso corresponderán a marcas que se estean comercializando, debendo estar etiquetadas segundo a normativa vixente. Todas as marcas deberán contar coa autorización de uso dos distintos consellos reguladores.

4. Non será admitido ningún participante que nos dous anos anteriores á data de presentación da solicitude, fose sancionado por infracción moi grave á lexislación agroalimentaria mediante resolución firme de calquera das administracións públicas.



5. As existencias mínimas en adega, da partida homoxénea concursante no momento da recollida das mostras serán de **5.000 litros**, dos que cando menos **1.000 litros** deberán estar embotellados e correctamente etiquetados e contarán coa contraetiqueta do consello regulador correspondente, para a obtención da mostra que se presente ao concurso.

Non obstante o establecido no parágrafo anteriores, para poder participar no grupo de “Viños de Colleiteiro e de pequenas adegas”, establecido no punto 13 das bases, deberá tratarse de viños elaborados por adegas con capacidade final de elaboración e embotellado non superior a 60.000 litros. As existencias mínimas na adega no momento da recollida das mostras da partida homoxénea concursante serán de **2.500 litros**, dos que cando menos **500 litros** deberán estar embotellados e correctamente etiquetados e contarán coa contraetiqueta do consello regulador correspondente para a obtención da mostra que se presente ao concurso.

Para poder participar no grupo de “Viños da Terra”, a partida homoxénea concursante deberá ter unhas existencias mínimas na adega de **1.250 litros** no momento da recollida das mostras e, cando menos, **500 litros** deberán estar embotellados e correctamente etiquetados para a obtención da mostra que se presente ao concurso.

A identificación e recollida das mostras será realizada pola organización, contando no caso dos viños con DO, con apoio de persoal do consello regulador de acordo co programa que previamente se estableza.

Para compoñer a mostra elixiranse ao chou seis botellas do lote concursante. Un representante da organización e un representante da adega asinarán na etiqueta de cada unha das botellas.

Unha das botellas da mostra quedará na adega e as cinco restantes, unha vez envoltas en material opaco, introduciranse nas caixas que se precintarán.

No exterior da caixa figurará unicamente o nome da denominación de orixe ou as mencións “Viño de Colleiteiro e pequena adega” ou “Viño da Terra” e se o viño é branco ou tinto, sendo transportadas ata o lugar da cata-concurso onde permanecerán depositadas e debidamente precintadas ata a celebración desta.

Da recollida de mostras levantarase a correspondente acta, na que asinarán un representante da adega e outro da organización.

6. Para a supervisión da cata existirá un xurado, presidido polo Secretario Xeral do Medio Rural e Montes, actuando como secretario un funcionario da Subdirección xeral de Industrias e Calidade Agroalimentaria e, como vogais, ata un máximo de cinco representantes dos consellos reguladores e ata un máximo de tres funcionarios de dita subdirección xeral.

7. Para a cualificación dos viños contarase cun panel de catadores, formado por un máximo de 12 expertos na análise sensorial, procedentes de asociacións, centros tecnolóxicos e científicos do sector vitivinícola, consellos reguladores dos viños, restauración, distribución e medios de comunicación especializados de Galicia e do resto do territorio español.

Para as catas de selección, e en razón do número de mostras, constituiranse varios paneis de expertos. Cada un deles contará, en todo momento, co material e elementos necesarios para o desenvolvemento do seu traballo de cata.

8. Empregarase o tipo de fichas oficiais aprobadas pola O.I.V.-U.I.O.E. e as súas normas de aplicación. Para a puntuación de cada viño obterase a media das puntuacións individuais dadas polos catadores que compoñen o panel de cata, desprezando previamente as puntuacións extremas. Nos casos de empate calcularíase a mediana para determinar a mostra seleccionada.

9. O secretario, e cando menos un dos membros do xurado de cata, comprobarán as actas de recollida e os precintos das caixas almacenadas e procederán a numeralas de forma correlativa por tipo de viño e denominación de orixe. A continuación procederase á apertura das caixas, das que se extraerán dúas botellas que se numerarán co mesmo número da caixa. Cada caixa, na que quedarán tres botellas, será precintada de novo, permanecendo convenientemente custodiada.

As dúas botellas numeradas por mostra para a cata de selección pasarán aos refrixeradores onde permanecerán debidamente pechadas e precintadas ata o momento de iniciarse a cata de selección. Se neste acto de numeración de caixas e botellas aparece algunha marca ou sinal que puidera permitir a súa identificación, a mostra sería anulada.

10. Os viños cataranse por cada grupo, por tipo e por series, realizándose os descansos precisos, ata a conclusión da análise sensorial das mostras.

O número máximo de viños seleccionados que pasarán á cata final será de seis para cada un dos grupos e tipos definidos no punto 13 destas bases.

Establecidos polo xurado os viños seleccionados nas precatas, o secretario procederá a separalos dándolles un novo número correlativo dentro de cada grupo e tipo, pasando a continuación aos refrixeradores que deberán estar totalmente baleiros e nos que, debidamente pechados e precintados, permanecerán ata a iniciación das catas finais.

11. As catas finais realizaranse seguindo as mesmas normas establecidas para as catas de selección.

Finalizada a cata-concurso, o secretario do xurado de cata procederá a identificar os viños premiados, tomando nota por escrito das marcas e adegas premiadas, e introducindo o documento cos citados datos en sobre pechado e lacrado. Este sobre será aberto no momento da entrega dos premios, permanecendo mentres tanto en poder do secretario do xurado.

12. O xurado desta cata-concurso coidará especialmente que se conserve en todo momento o anonimato das mostras. O seu ditame nos premios será inapelable.

A entrega de premios realizarase nun acto convocado e organizado para tal fin, ao que se dotará da difusión, transcendencia e solemnidade axeitada.

13. Tanto para as catas de selección como para as catas finais establécense os grupos ou categorías seguintes:

- Denominación de Orixe Monterrei
- Denominación de Orixe Rías Baixas
- Denominación de Orixe Ribeira Sacra
- Denominación de Orixe Ribeiro
- Denominación de Orixe Valdeorras
- Viños de Colleiteiro e pequenas adegas
- Viños con Indicación Xeográfica (Viños da Terra)

Dentro de cada un destes grupos diferenciaranse dous tipos: Viño branco e viño tinto.

Se nalgunha das categorías non se contase cun mínimo de 5 mostras para a cata, esta non terá lugar.

14. Nesta XXVI Cata dos Viños de Galicia establécense os seguintes premios:

- Mellor Viño Branco de Galicia e Mellor Viño Tinto de Galicia.

Para a selección destes dous premios realizarase unha cata final cos viños brancos e tintos mellor puntuados en cada denominación.

Entregarase un trofeo e un diploma acreditativos para o viño branco e o viño tinto que resulten mellor puntuados na cata final arriba mencionada.

- A continuación, e para cada denominación de orixe de viños de Galicia, outorgaranse tres premios (trofeo e diploma acreditativo do posto acadado) aos tres viños mellor puntuados, coa exclusión se é o caso, dos premiados como mellor branco e mellor tinto de Galicia, así como diplomas para o resto dos finalistas en cada categoría.
- Para o grupo “Viños de Colleiteiro e pequenas adegas” outorgarase premio para o mellor viño branco e mellor viño tinto de colleiteiro de tódalas denominacións. Non obstante o anterior, se o número de mostras presentadas nalgún dos tipos (branco ou tinto) superase as 15, outorgaranse dous premios, e tres premios no caso de superarse as 25 mostras.

As adegas que se inscriban para participar na categoría de “Viños de Colleiteiro e pequenas adegas” quedarán excluídas de concursar e optar a premios nas outras categorías do concurso.



- Para o grupo “Viños da Terra” outorgarase premio para o mellor viño da terra de todas as indicacións xeográficas.

15. Tódolos participantes nesta XXVI Cata dos Viños de Galicia comprométense a acatar as presentes bases de cata.

16. O secretario xeral de Medio Rural e Montes ditará cantas instrucións sexan necesarias de cara ao correcto desenvolvemento desta XXVI Cata dos Viños de Galicia.



BOLETÍN DE INSCRICIÓN

XXVI Cata dos Viños de Galicia

ADEGA:

CATEGORÍA NA QUE CONCURSA:

MARCAS COMERCIAIS	VOLUME TOTAL DA PARTIDA HOMOXÉNEA CONCURSANTE* (Litros)	IDENTIFICACIÓN DA PARTIDA CONCURSANTE (Indicar nº/nºs de lote/s do viño embotellado e identificar o depósito do viño sen embotellar)

*Neste contexto, entenderase por partida homoxénea concursante a cantidade de viño elaborado baixo idénticas condicións, que participa no concurso e mantén constantes as súas características. Considerarase a estes efectos o viño procedente do mesmo depósito.

ENDEREZO:

LOCALIDADE:

C.P.:

TELÉFONO:

E-MAIL:

SINATURA:

DATA:

Este boletín, debidamente cumprimentado, deberá enviálo no prazo de **7 días** desde o seguinte ao da publicación no DOG do anuncio da convocatoria aos respectivos consellos reguladores nos que estean inscritos, que deixarán constancia da data e hora de presentación. No caso de ser viños con indicación xeográfica (Viños da Terra), deberán enviálo a Subdirección de Industrias e Calidade Agroalimentaria da Secretaría Xeral do Medio Rural e Montes.